

প্রবন্ধ

লেখক: মোঃ মিরাজ হোসেন

একুশ শতকে রবীন্দ্রনাথ ঠাকুরের প্রাসঙ্গিকতা

The Relevance of Rabindranath Tagore in the Twenty-First Century

মূল বাংলা রচনা

একুশ শতকে রবীন্দ্রনাথ ঠাকুরের প্রাসঙ্গিকতা

ভূমিকা

বিশ্বইতিহাসের এমন কিছু মুহূর্ত আসে যখন একটি নতুন প্রযুক্তি বা রাজনৈতিক পরিবর্তন মানবজাতির সামনে এমন প্রশ্ন তুলে ধরে যার উত্তর প্রচলিত চিন্তাভাবনায় মেলে না। একুশ শতক ঠিক এমনই একটি সন্ধিক্ষণ। কৃত্রিম বুদ্ধিমত্তা, বিগ ডেটা, উগ্র জাতীয়তাবাদ, ধর্মীয় মৌলবাদ, পরিবেশ বিপর্যয় এবং মানবিক অর্থের সংকট একসঙ্গে মাথাচাড়া দিয়ে উঠেছে। তথ্যপ্রযুক্তির বিপ্লব মানুষের স্বাধীনতা, সমতা ও মানবিক পরিচয়কে অভূতপূর্ব সংকটে ফেলেছে।

এই সংকটগুলো নতুন মনে হলেও এদের মূলে রয়েছে কিছু চিরন্তন প্রশ্ন যেমন মানুষের স্বাধীনতা কতটুকু, ক্ষমতার বিন্যাস কেমন হওয়া উচিত, শিক্ষার উদ্দেশ্য কী, ধর্ম ও মানবতার মধ্যে সম্পর্ক কোথায়। এই প্রশ্নগুলো রবীন্দ্রনাথ ঠাকুর (১৮৬১-১৯৪১) সারাজীবন জিজ্ঞেস করেছেন। তাঁর কবিতা, উপন্যাস, নাটক, প্রবন্ধ ও শিক্ষাকর্মে যে দর্শন গড়ে উঠেছে তা একুশ শতকের প্রতিটি সংকটের সঙ্গে গভীরভাবে কথা বলে। এই প্রবন্ধে একুশ শতকের কিছু মূল সংকটের প্রেক্ষাপটে রবীন্দ্রনাথের প্রাসঙ্গিকতা বিশ্লেষণ করা হয়েছে।

স্বাধীনতা ও সমতার সংকট

বিগ ডেটার যুগে স্বাধীনতার অর্থ কী?

একুশ শতকে স্বাধীনতার সংকট আগেকার স্বৈরশাসনের মতো প্রকাশ্য নয়। এটি অদৃশ্য, নিরব এবং তাই অনেক বেশি বিপজ্জনক। গুগল, ফেসবুক, আমাজনের মতো প্রযুক্তি কোম্পানিগুলো প্রতিটি ব্যবহারকারীর প্রতিটি ক্লিক, প্রতিটি সার্চ, প্রতিটি মুহূর্তের অনলাইন আচরণ সংগ্রহ করছে এবং সেই তথ্য বিশ্লেষণ করে মানুষের ভবিষ্যৎ সিদ্ধান্তকে প্রভাবিত করছে। ইসরায়েলি ইতিহাসবিদ ইউভাল নোয়া হারারি সতর্ক করেছেন যে বিগ ডেটা অ্যালগরিদম এমন ডিজিটাল স্বৈরতন্ত্র তৈরি করতে পারে যেখানে সমস্ত ক্ষমতা একটি ক্ষুদ্র অভিজাত শ্রেণির হাতে কেন্দ্রীভূত হবে এবং বেশিরভাগ মানুষ শুধু শোষণের শিকার নয়, সম্পূর্ণ অপ্রাসঙ্গিক হয়ে পড়বে।

উদারনৈতিক গণতন্ত্রের মূলে রয়েছে এই বিশ্বাস যে মানুষের ভেতরে স্বাধীন ইচ্ছাশক্তি আছে এবং সেই ইচ্ছাশক্তির ভিত্তিতেই সে তার জীবন ও সমাজ পরিচালনার সিদ্ধান্ত নেয়। কিন্তু অ্যালগরিদম যদি ঠিক করে দেয় কে কোন তথ্য দেখবে এবং কোন মতামত তৈরি করবে, তাহলে "স্বাধীন ইচ্ছা" কতটুকু বাস্তব থাকে? এখানে উদারনৈতিক রাজনীতির মূল ভিত্তিটাই ভেঙে পড়ে।

এডওয়ার্ড স্লোডেনের ফাঁস করা নথি প্রমাণ করেছে পশ্চিমা গণতান্ত্রিক রাষ্ট্রগুলোও কোটি কোটি নাগরিকের যোগাযোগে নজর রাখছে (Greenwald, 2014)। ২০১৬ সালের কেমব্রিজ অ্যানালিটিকা কেলেঙ্কারিতে দেখা গেছে ফেসবুকের ডেটা ব্যবহার করে লক্ষ লক্ষ ভোটারের রাজনৈতিক মতামত নিয়ন্ত্রণ করা সম্ভব হয়েছিল।

রবীন্দ্রনাথ মানুষের স্বাধীনতাকে মানবসত্তার সবচেয়ে মৌলিক বৈশিষ্ট্য হিসেবে চিহ্নিত করেছেন। তাঁর বিখ্যাত কবিতায় তিনি এমন একটি স্বর্গের স্বপ্ন দেখেছেন যেখানে "চিত্ত ভয়শূন্য উচ্চ যেথা শির", যেখানে মানুষ ভয় ছাড়া চিন্তা করতে পারে, কথা বলতে পারে এবং কাজ করতে পারে (ঠাকুর, ১৯১০)। এই স্বপ্ন আজকের নজরদারির যুগে

আরও বেশি প্রাসঙ্গিক, কারণ যে সমাজে মানুষ জানে তার প্রতিটি পদক্ষেপ রেকর্ড হচ্ছে, সে সমাজে মানুষ কখনো সম্পূর্ণ স্বাধীনভাবে চিন্তা করতে পারে না।

তাঁর "অচলায়তন" নাটকে রবীন্দ্রনাথ দেখিয়েছেন একটি প্রতিষ্ঠান কীভাবে মানুষকে অন্ধ আনুগত্যের যন্ত্রে পরিণত করে (ঠাকুর, ১৯১২)। সেকালের ধর্মীয় প্রতিষ্ঠানের এই রূপকটি একালের অ্যালগরিদমের ক্ষেত্রেও প্রযোজ্য। অ্যালগরিদম মানুষকে প্রশ্ন করার প্রয়োজনীয়তাই ভুলিয়ে দিচ্ছে, কারণ সে সবসময় "পরবর্তী কনটেন্ট" সরবরাহ করতে প্রস্তুত। রবীন্দ্রনাথের "তাসের দেশ" নাটকে যে সমাজের চিত্র আঁকা হয়েছে যেখানে সবাই নির্দেশমতো চলে, কেউ নিজে ভাবে না তা আজকের "ফিল্টার বাবল" ও "ইকো চেম্বার"-এর রূপক হিসেবে পড়া যায় (ঠাকুর, ১৯৩৩; Pariser, 2011)।

রবীন্দ্রনাথের শিক্ষাদর্শনে "সমালোচনামূলক চিন্তা" বা critical thinking-এর উপর অসাধারণ জোর ছিল। শান্তিনিকেতনে তিনি চাইতেন শিক্ষার্থীরা কোনো কিছু অন্ধভাবে গ্রহণ না করে নিজেরা প্রশ্ন করুক (ঠাকুর, ১৯১৫)। আজকের ডিজিটাল সাক্ষরতার আন্দোলন এটাই বলছে যে মানুষকে শেখাতে হবে অ্যালগরিদম যা দেখাচ্ছে তা যাচাই করতে, তথ্যের উৎস প্রশ্ন করতে এবং নিজস্ব বিচারবুদ্ধি প্রয়োগ করতে (Hobbs, 2010)। রবীন্দ্রনাথ এই শিক্ষার পথিকৃৎ।

তাঁর "মুক্তধারা" নাটকের কেন্দ্রীয় রূপকটিও এখানে প্রাসঙ্গিক। স্বৈরশাসক যন্ত্র দিয়ে মুক্তধারার জলপ্রবাহ আটকে রাখতে চায়, কিন্তু সেই বাঁধ ভেঙে পড়ে মানুষের আল্লার মুক্তির ডাকে (ঠাকুর, ১৯২২)। একুশ শতকের ডিজিটাল নজরদারি সেই বাঁধেরই আধুনিক রূপ। এটি তথ্যের প্রবাহ নিয়ন্ত্রণ করে এবং মানুষের চিন্তার স্বাধীনতা সীমিত করে। রবীন্দ্রনাথের দর্শন সেই বাঁধ ভাঙার অনুপ্রেরণা দেয়।

ডাটার মালিকানায় সমতা বিলীন

ডেটা হলো একুশ শতকে সবচেয়ে গুরুত্বপূর্ণ সম্পদ। উনিশ শতকে যে দেশ কয়লা ও লোহার খনির মালিক ছিল সে দেশ শিল্পবিপ্লবে এগিয়ে গিয়েছিল। একুশ শতকে যে কোম্পানি বা দেশ বিপুল পরিমাণ ডেটার মালিক, সে-ই ক্ষমতার কেন্দ্রে থাকবে।

শিল্পবিপ্লবের বৈষম্য ছিল উৎপাদনের উপায়ের মালিকানায়; ডিজিটাল বিপ্লবের বৈষম্য হলো ডেটার মালিকানায়। পার্থক্য হলো, কয়লার খনি থেকে যাঁরা বঞ্চিত ছিলেন তাঁরা অন্তত তাদের শ্রমশক্তি দিয়ে মূল্য তৈরি করতে পারতেন; কিন্তু ডিজিটাল অর্থনীতিতে কৃত্রিম বুদ্ধিমত্তা যদি মানুষের শ্রমকেও প্রতিস্থাপন করে ফেলে, তাহলে বঞ্চিত মানুষের কাছে দেওয়ার মতো আর কিছুই থাকে না।

অক্সফামের ২০২৬ সালের প্রতিবেদন অনুযায়ী ২০২৫ সালে বিশ্বের বিলিওনেয়ারদের মোট সম্পদ ইতিহাসের সর্বোচ্চ ১৮.৩ ট্রিলিয়ন ডলারে পৌঁছেছে এবং মাত্র এক বছরে তাদের সম্পদ ২.৫ ট্রিলিয়ন ডলার বৃদ্ধি পেয়েছে যা পৃথিবীর নিচের অর্ধেক মানুষ অর্থাৎ ৪১০ কোটি মানুষের মোট সম্পদের প্রায় সমান। একই সময়ে বিশ্বের প্রায় অর্ধেক জনগোষ্ঠী দারিদ্র্যসীমার নিচে বাস করছে এবং এই বৈষম্য ক্রমশ বাড়ছে (Oxfam, 2026)।

বাংলাদেশের প্রেক্ষাপটে এই বৈষম্য আরও তীক্ষ্ণ। ডিজিটাল পরিষেবায় প্রবেশাধিকারের ক্ষেত্রে শহর ও গ্রামের মধ্যে, ধনী ও দরিদ্রের মধ্যে এবং শিক্ষিত ও অশিক্ষিতের মধ্যে যে বিস্তর ব্যবধান রয়েছে তা ডিজিটাল বিভাজন

বা digital divide নামে পরিচিত (Warschauer, 2003)। যারা এই বিভাজনের ভুল দিকে আছে, তারা কেবল প্রযুক্তির সুফল থেকেই বঞ্চিত নয়, ক্রমশ অর্থনৈতিক সুযোগ থেকেও বিচ্ছিন্ন হয়ে পড়ছে।

রবীন্দ্রনাথ সামাজিক বৈষম্যের প্রশ্নে শুধু তাত্ত্বিক ছিলেন না, তিনি বাস্তব জীবনে তা মোকাবিলার চেষ্টা করেছেন। বাংলাদেশের পতিসরে তিনি কৃষক সমবায় প্রতিষ্ঠা করেছিলেন এবং মহাজনদের শোষণ থেকে কৃষকদের রক্ষার জন্য সহজ শর্তে ঋণ দেওয়ার ব্যবস্থা করেছিলেন (মুখোপাধ্যায়, ১৯৬০)। এই সমবায় আন্দোলনের পেছনে ছিল তাঁর গভীর বিশ্বাস যে সত্যিকারের উন্নয়ন আসে নিচ থেকে উপরে, সাধারণ মানুষের সক্ষমতা বৃদ্ধির মাধ্যমে, উপর থেকে চাপিয়ে দেওয়া পরিকল্পনার মাধ্যমে নয় (ঠাকুর, ১৯০৪)। নোবেলজয়ী অর্থনীতিবিদ অমর্ত্য সেন তাঁর "সক্ষমতা পদ্ধতি" বা capability approach-এ যে কথা বলেছেন যে উন্নয়ন মানে মানুষের সক্ষমতা বৃদ্ধি, শুধু আয় বৃদ্ধি নয় তার শিকড় রবীন্দ্রনাথের চিন্তায়ই খুঁজে পাওয়া যায় (Sen, 1999)।

কর্ম সংকট

কৃত্রিম বুদ্ধিমত্তার দ্রুত অগ্রগতি একুশ শতকের কর্মবাজারে এক অভূতপূর্ব ঝড় তুলেছে। বিভিন্ন ক্ষেত্রে কৃত্রিম বুদ্ধিমত্তা মানুষের চেয়ে দ্রুততর ও নির্ভুলতর হয়ে উঠছে। বিশ্ব অর্থনৈতিক ফোরামের ২০২৫ সালের "ভবিষ্যতের কর্মসংস্থান" প্রতিবেদন অনুযায়ী বিশ্বজুড়ে ৪১ শতাংশ নিয়োগকর্তা আগামী পাঁচ বছরে কৃত্রিম বুদ্ধিমত্তার কারণে তাদের কর্মীসংখ্যা হ্রাস করার পরিকল্পনা করছেন। আন্তর্জাতিক মুদ্রা তহবিলের ২০২৪ সালের মূল্যায়ন অনুযায়ী বিশ্বের প্রায় ৪০ শতাংশ চাকরি কৃত্রিম বুদ্ধিমত্তার সামর্থ্যের সঙ্গে সংযুক্ত। উন্নত অর্থনীতিগুলোতে এই হার ৬০ শতাংশ পর্যন্ত পৌঁছায় (IMF, 2024; WEF, 2025)।

এই পরিবর্তনের গতি এতটাই দ্রুত যে প্রচলিত শিক্ষাব্যবস্থা এর সঙ্গে তাল মেলাতে পারছে না। একটি শিশু আজ যা শিখছে, সে যখন কর্মজীবনে প্রবেশ করবে তখন সেই দক্ষতার অনেকটাই হয়তো অপ্রাসঙ্গিক হয়ে যাবে। একুশ শতকে সবচেয়ে গুরুত্বপূর্ণ দক্ষতা হলো "শেখার দক্ষতা" অর্থাৎ ক্রমাগত পরিবর্তনশীল পরিবেশে নিজেকে পুনর্নির্মাণ করার ক্ষমতা (Harari, 2018)। কিন্তু বর্তমান শিক্ষাব্যবস্থা এখনো মূলত তথ্য মুখস্থ করানো ও নির্দিষ্ট দক্ষতা অর্জনের উপর নির্ভরশীল, যা এই নতুন বাস্তবতার জন্য মোটেই প্রস্তুত নয়।

রবীন্দ্রনাথের শিক্ষাদর্শন একুশ শতকের এই কর্মসংকটের সবচেয়ে প্রাসঙ্গিক উত্তর দেয়। তিনি প্রচলিত শিক্ষাব্যবস্থার যে সমালোচনা করেছিলেন তা আজকের পরিপ্রেক্ষিতে আরও বেশি সত্য। তাঁর "শিক্ষার হেরফের" প্রবন্ধে তিনি বলেছিলেন, বিদ্যালয় শিশুকে তথ্য ভরা একটি পাত্রে পরিণত করছে, কিন্তু তার কৌতূহল, সৃজনশীলতা ও স্বাধীন চিন্তার শক্তিকে নষ্ট করে দিচ্ছে (ঠাকুর, ১৮৯২)। এই সমালোচনা আজ আরও বেশি প্রাসঙ্গিক কারণ তথ্য মুখস্থ করার কাজ কৃত্রিম বুদ্ধিমত্তা মানুষের চেয়ে অনেক ভালো করতে পারে। মানুষের একমাত্র তুলনামূলক সুবিধা রয়ে যায় সৃজনশীলতায়, সমালোচনামূলক চিন্তায় এবং মানবিক সংযোগে।

শান্তিনিকেতনে রবীন্দ্রনাথ যে শিক্ষাপদ্ধতি প্রবর্তন করেছিলেন তা আজকের "২১শ শতকের দক্ষতা" আন্দোলনের সঙ্গে আশ্চর্যজনকভাবে মিলে যায়। প্রকৃতির মধ্যে শিক্ষা, শিল্পকলার সঙ্গে বিজ্ঞানের সমন্বয়, শিক্ষার্থীর স্বতন্ত্র মেধার বিকাশ এবং বিভিন্ন সংস্কৃতির সঙ্গে পরিচয় ইত্যাদি এগুলো আজকের শিক্ষাবিদরা যা বলছেন তার কাছাকাছি। ফিনল্যান্ড বা সিঙ্গাপুরের সফল শিক্ষাব্যবস্থার সঙ্গে শান্তিনিকেতনের মডেলের গভীর মিল রয়েছে (Sahlberg, 2011)।

রবীন্দ্রনাথ কর্মকে জীবিকার বাইরেও আল্পপ্রকাশ ও আল্পউপলব্ধির মাধ্যম হিসেবে দেখেছেন। তাঁর "কর্মযোগ" ভাবনায় কাজ তখনই অর্থবহ হয় যখন সে কাজে ব্যক্তির সৃজনশীলতা ও আল্পার অংশগ্রহণ থাকে (ঠাকুর, ১৯০৯)। কৃত্রিম বুদ্ধিমত্তা যখন পুনরাবৃত্তিমূলক কাজগুলো নিয়ে নেবে, তখন মানুষের সামনে এই সুযোগ তৈরি হবে যে সে কেবল সেই কাজগুলোই করবে যাতে সত্যিকারের মানবিক সৃজনশীলতা লাগে। রবীন্দ্রনাথের দৃষ্টিভঙ্গিতে এটি একটি সম্ভাবনা যদি সঠিক শিক্ষাব্যবস্থা থাকে।

জাতীয়তাবাদ-সংক্রান্ত সংকট

বিভিন্ন দেশে "আমার দেশ প্রথম" নীতি জনপ্রিয় হচ্ছে। বৈশ্বিক সহযোগিতার প্রতিষ্ঠানগুলো যেমন, জাতিসংঘ, বিশ্ব বাণিজ্য সংস্থা, জলবায়ু চুক্তি দুর্বল হয়ে পড়ছে।

রবীন্দ্রনাথ উগ্র জাতীয়তাবাদের সবচেয়ে দূরদর্শী সমালোচকদের একজন। তাঁর "নেশনালিজম" গ্রন্থটি ১৯১৭ সালে প্রকাশিত হয়েছিল প্রথম বিশ্বযুদ্ধের ধ্বংসযজ্ঞের মধ্যে এবং সেই সময়ে তিনি সতর্ক করেছিলেন যে জাতীয়তাবাদ যখন মানবতার উপরে স্থান পায়, তখন তা অপরিমেয় ক্ষতি করে (Tagore, 1917)। একশ বছরেরও বেশি আগে লেখা এই সতর্কতা আজও সমানভাবে প্রাসঙ্গিক।

রবীন্দ্রনাথ জাতীয়তাবাদ ও দেশপ্রেমের মধ্যে একটি গুরুত্বপূর্ণ পার্থক্য করেছেন। দেশকে ভালোবাসা, দেশের মানুষের জন্য কাজ করা — এটি মহৎ। কিন্তু নিজের জাতিকে শ্রেষ্ঠ মনে করে অন্য জাতিকে ঘৃণা করা বা অবজ্ঞা করা — এটি বিপজ্জনক (Tagore, 1917)। তিনি বিশ্বাস করতেন মানুষের পরিচয় একটি স্তরেই শেষ হয় না; একজন মানুষ একই সঙ্গে তার পরিবারের সদস্য, তার গ্রামের বাসিন্দা, তার দেশের নাগরিক এবং বিশ্বমানবতার অংশ।

তাঁর "বিশ্বভারতী" প্রতিষ্ঠার পেছনে ছিল এই বিশ্বমানবতার দর্শন। "বিশ্বের সঙ্গে যোগে যেথায় বিহারো", বিশ্বের সঙ্গে যোগাযোগের মধ্য দিয়েই মানুষ পূর্ণ হয়ে ওঠে (ঠাকুর, ১৯১২)। বিশ্বভারতীতে বিভিন্ন দেশের শিল্পকলা, দর্শন ও সংস্কৃতির অধ্যয়নের ব্যবস্থা ছিল। পূর্বের ঐতিহ্যকে পশ্চিমের জ্ঞানের সঙ্গে মেলানোর চেষ্টা ছিল। এই আন্তঃসাংস্কৃতিক সংলাপের ভাবনা আজকের বৈশ্বিক সহযোগিতার সবচেয়ে জরুরি ভিত্তি।

ধর্ম যখন হাতিয়ার

একুশ শতকে ধর্ম একটি নতুন ও বিপজ্জনক রূপান্তরের মধ্য দিয়ে যাচ্ছে। ধর্ম আর কেবল ব্যক্তির আধ্যাত্মিক সাধনার বিষয় নয়, এটি রাষ্ট্রীয় ক্ষমতার হাতিয়ার হয়ে উঠেছে। বিশ্বের বিভিন্ন দেশে রাজনৈতিক নেতারা ধর্মীয় পরিচয়কে ব্যবহার করে নিজেদের ক্ষমতা সুদৃঢ় করছেন, সংখ্যালঘুদের বিরুদ্ধে বিদ্বেষ তৈরি করছেন এবং যৌক্তিক আলোচনাকে ধর্মদ্রোহিতার অপবাদে স্তব্ধ করে দিচ্ছেন। ভারতে হিন্দু জাতীয়তাবাদ, মধ্যপ্রাচ্যে ইসলামি মৌলবাদ, আমেরিকায় খ্রিস্টান জাতীয়তাবাদ প্রতিটি ক্ষেত্রে দেখা যাচ্ছে ধর্মকে সার্বজনীন মানবতার পরিবর্তে একটি বিশেষ গোষ্ঠীর স্বার্থে ব্যবহার করা হচ্ছে (Juergensmeyer, 2017)।

এই ধর্মীয় রাজনীতির সবচেয়ে ভয়াবহ পরিণতি হলো সাম্প্রদায়িক হিংসা। মিয়ানমারে রোহিঙ্গা নিধন, ভারতে সাম্প্রদায়িক দাঙ্গা, মধ্যপ্রাচ্যে শিয়া-সুন্নি সংঘাত ইত্যাদি প্রমাণ করে যে ধর্মকে যখন জাতিগত বা রাজনৈতিক পরিচয়ের সঙ্গে মিশিয়ে দেওয়া হয়, তখন তা অত্যন্ত বিধ্বংসী হয়ে ওঠে (Appleby, 2000)।

রবীন্দ্রনাথ কোনো বিশেষ ধর্মীয় সম্প্রদায়ের প্রতিনিধি ছিলেন না, তিনি একটি সার্বজনীন মানবিক আধ্যাত্মিকতার সন্ধান করেছেন যা সকল ধর্মের মানুষকে একত্রিত করে (ঠাকুর, ১৯১০)। তাঁর "গীতাঞ্জলি"-তে ঈশ্বরকে পাওয়া যায় না কোনো মন্দির বা মসজিদে; তাঁকে পাওয়া যায় কৃষকের মাঠে, পথের ধূলায়, সাধারণ মানুষের কণ্ঠে ও আনন্দে।

তাঁর বিখ্যাত কবিতায় তিনি লিখেছেন যে যখন মানুষ বাইরে ঈশ্বরকে খুঁজতে যায়, ঈশ্বর তখন মানুষের মাঝেই থাকেন, শ্রমজীবী মানুষের পাশে (ঠাকুর, ১৯১০)। এই মানবমুখী ধর্মদর্শন ধর্মকে রাজনৈতিক হাতিয়ারে পরিণত করার বিরুদ্ধে সবচেয়ে শক্তিশালী প্রতিরোধ। যে ধর্ম মানুষকে মানুষের কাছে নিয়ে যায়, সে ধর্মকে মানুষের বিরুদ্ধে ব্যবহার করা সম্ভব নয়।

রবীন্দ্রনাথের "অচলায়তন" নাটকে প্রাতিষ্ঠানিক ধর্মের অন্ধ আনুগত্যের বিরুদ্ধে তীব্র প্রতিবাদ রয়েছে (ঠাকুর, ১৯১২)। অচলায়তন হলো সেই ধর্মীয় প্রতিষ্ঠান যেখানে শত বছরের পুরনো নিয়ম কেউ প্রশ্ন করতে পারে না, যে প্রশ্ন করে তাকে শাস্তি দেওয়া হয়। এই রূপকটি আজকের ধর্মীয় মৌলবাদের সঙ্গে সরাসরি মিলে যায়। মৌলবাদ সবসময় প্রশ্নকে ভয় পায়। কারণ প্রশ্ন করলে প্রশ্ন করার অধিকার জন্মায়, এবং সেই অধিকার মৌলবাদী ক্ষমতার ভিত্তিকে দুর্বল করে।

১৯০৫ সালের বঙ্গভঙ্গ আন্দোলনে রবীন্দ্রনাথ যখন "রাখিবন্ধন" উৎসবের আয়োজন করেছিলেন, তখন তিনি হিন্দু-মুসলিম উভয় সম্প্রদায়ের মানুষকে একে অপরের হাতে রাখি বেঁধে ঐক্যের প্রতীক স্থাপন করিয়েছিলেন (মুখোপাধ্যায়, ১৯৬০)। এই উদ্যোগ ছিল ধর্মীয় বিভেদকে সচেতনভাবে অতিক্রম করার একটি সাংস্কৃতিক কর্মসূচি। একুশ শতকে যখন সাম্প্রদায়িক উত্তেজনা ছড়ানোর জন্য সামাজিক যোগাযোগ মাধ্যম ব্যবহার করা হচ্ছে, তখন রবীন্দ্রনাথের এই সাংস্কৃতিক সেতুবন্ধনের কৌশল আরও বেশি প্রাসঙ্গিক।

রবীন্দ্রনাথের সমগ্র জীবন ও দর্শনে একটি কথা বারবার ফিরে এসেছে যে ধর্ম মানুষকে বিশ্বাস করতে শেখায়, সে ধর্ম কখনো হিংসার হাতিয়ার হতে পারে না। ধর্মীয় সহিংসতার বিরুদ্ধে এটিই সবচেয়ে শক্তিশালী নৈতিক অবস্থান।

পোস্ট-টুথ যুগে রবীন্দ্রনাথ

"পোস্ট-টুথ" একুশ শতকের সবচেয়ে বিপজ্জনক ঘটনাগুলোর একটি। ভুয়া তথ্য, মিথ্যা সংবাদ এবং পরিকল্পিত অপতথ্য ছড়ানোর ক্ষমতা এখন যেকোনো সময়ের চেয়ে বেশি এবং একবার ছড়িয়ে পড়লে তা মিথ্যা প্রমাণ করাও অত্যন্ত কঠিন। সামাজিক যোগাযোগ মাধ্যমে একটি মিথ্যা খবর একটি সত্য খবরের চেয়ে ছয় গুণ দ্রুত ছড়ায় (Vosoughi et al., 2018)। কারণ মিথ্যা সংবাদ প্রায়ই মানুষের ক্রোধ, ভয় ও বিস্ময় এসমস্ত আবেগকে উস্কে দেয় এবং এই আবেগের বশে মানুষ যাচাই না করেই শেয়ার করে। ডিপফেক প্রযুক্তি এই সমস্যাকে আরও জটিল করেছে। এখন এমন ভিডিও তৈরি করা সম্ভব যেখানে বাস্তব মানুষকে এমন কথা বলতে দেখা যাচ্ছে যা সে কখনো বলেনি (Chesney & Citron, 2019)।

বাংলাদেশে গুজব ও ভুয়া তথ্যের বিস্তার বর্তমানে একটি জীবনঘাতী সংকটে পরিণত হয়েছে, যা ২০২৪ সালের জুলাই-আগস্টের গণঅভ্যুত্থান থেকে শুরু করে ২০২৫ সালের ডিসেম্বরে শীর্ষস্থানীয় গণমাধ্যমের ওপর হামলা পর্যন্ত প্রতিটি ঘটনার মূল প্রভাবক হিসেবে কাজ করেছে। ডিসমিসল্যাব ও রিউমার স্ক্যানারের সাম্প্রতিক উপাত্ত অনুযায়ী, গত এক বছরে ভুয়া তথ্যের পরিমাণ কেবল ৫৮ শতাংশ বৃদ্ধিই পায়নি, বরং এর প্রায় ৫২ শতাংশই

ভিডিওর মাধ্যমে এবং উল্লেখযোগ্য অংশ কৃত্রিম বুদ্ধিমত্তা (AI) ব্যবহার করে ছড়ানো হচ্ছে। এই পরিকল্পিত অপপ্রচার সাম্প্রদায়িক সহিংসতা উসকে দেওয়ার পাশাপাশি ২০২৪ সালে ১৭৩ জন মানুষের গণপিটুনিতে মৃত্যুর কারণ হয়ে দাঁড়িয়েছে, যা প্রমাণ করে যে বাংলাদেশে 'পোস্ট-ট্রুথ' বাস্তবতা এখন কেবল তাত্ত্বিক বিতর্ক নয়, বরং জাতীয় নিরাপত্তা ও জীবনের জন্য এক চরম ঝুঁকি।

রবীন্দ্রনাথ সত্যান্বেষণকে মানবজীবনের সর্বোচ্চ দায়িত্বগুলোর একটি মনে করতেন। তাঁর "সত্য" প্রবন্ধে তিনি বলেছেন মিথ্যার কাছে পরাজয় মানুষকে শুধু বৌদ্ধিকভাবে নয়, নৈতিকভাবেও দুর্বল করে দেয় (ঠাকুর, ১৯০৮)। সত্যের প্রতি অঙ্গীকার তাঁর কাছে শুধু বৌদ্ধিক মূল্যবোধ নয়, এটি একটি আধ্যাত্মিক দায়িত্ব কারণ তিনি বিশ্বাস করতেন পরম সত্য নিজেই সত্য।

তাঁর "চার অধ্যায়" উপন্যাসে দেখা যায় কীভাবে একটি মহৎ লক্ষ্যও মিথ্যা ও হিংসার পথ ধরলে তার পরিণাম ভয়ংকর হয় (ঠাকুর, ১৯৩৪)। বিপ্লবী আন্দোলনের নামে মিথ্যা প্রচার ও সহিংসতার বিরুদ্ধে এই উপন্যাস একটি শক্তিশালী নৈতিক বিবৃতি। একুশ শতকে যখন রাজনৈতিক দলগুলো নিজেদের লক্ষ্য অর্জনের জন্য ভুয়া তথ্য ব্যবহার করছে, তখন রবীন্দ্রনাথের এই নৈতিক অবস্থান অত্যন্ত প্রাসঙ্গিক।

রবীন্দ্রনাথ তাঁর শিক্ষাদর্শনে যুক্তি ও প্রমাণভিত্তিক চিন্তার উপর বিশেষ জোর দিয়েছেন। শান্তিনিকেতনে তিনি চাইতেন শিক্ষার্থীরা কোনো কিছু চোখ বুজে বিশ্বাস না করে নিজেরা প্রশ্ন করুক ও যাচাই করুক (ঠাকুর, ১৯১৫)। এই সমালোচনামূলক চিন্তার অভ্যাসই পোস্ট-সত্যের বিরুদ্ধে সবচেয়ে কার্যকর প্রতিষেধক। আজকের মিডিয়া সাফরতার শিক্ষা আন্দোলন মানুষকে তথ্য যাচাই করতে, উৎস প্রশ্ন করতে এবং অ্যালগরিদমের ফাঁদ এড়াতে শেখাচ্ছে যা রবীন্দ্রনাথের শিক্ষাদর্শনের আধুনিক রূপ (Hobbs, 2010)।

তাঁর "রাজা ও রানী" নাটকে দেখা যায় একটি মিথ্যা কীভাবে রাজ্যে বিষ ছড়িয়ে দেয় এবং সত্যের আলোয় সেই বিষ কীভাবে নিরাময় হয় (ঠাকুর, ১৮৮৯)। এই রূপকটি আজকের ফেক নিউজ ও ডিসইনফর্মেশনের যুগে হুবহু প্রযোজ্য। একটি সমাজে যখন মিথ্যা প্রতিষ্ঠানিক রূপ নেয়। যখন ক্ষমতাসীনরা মিথ্যাকে সত্য বলে প্রচার করে তখন সাহিত্য ও সংস্কৃতির মাধ্যমে সেই মিথ্যাকে উন্মোচন করাই সত্যের সবচেয়ে কার্যকর পথ।

রবীন্দ্রনাথের "আত্মশক্তি" প্রবন্ধে তিনি বলেছেন একটি জাতির সবচেয়ে বড় শক্তি হলো তার সত্যবাদিতার ঐতিহ্য; যে জাতি মিথ্যার আশ্রয় নেয় সে জাতি দীর্ঘমেয়াদে দুর্বল হয়ে পড়ে (ঠাকুর, ১৯০৫)। একুশ শতকে পোস্ট-সত্যের রাজনীতি ঠিক এই দুর্বলতার দিকেই নিয়ে যাচ্ছে। রবীন্দ্রনাথের সত্যনিষ্ঠার দর্শন সেই অধঃপতন রোধের সবচেয়ে কার্যকর নৈতিক ভিত্তি।

কৃত্রিম বুদ্ধিমত্তার যুগে শিক্ষার সংকট

প্রচলিত শিক্ষাব্যবস্থা মূলত শিল্পবিপ্লবের যুগে তৈরি হয়েছিল যেখানে লক্ষ্য ছিল এমন মানুষ তৈরি করা যারা কারখানায় কাজ করতে পারবে, নির্দিষ্ট নিয়ম মেনে চলবে এবং একটি স্থিতিশীল পেশায় সারাজীবন কাজ করবে। কিন্তু একুশ শতকে এই মডেল সম্পূর্ণ অকার্যকর হয়ে পড়েছে। আজকের শিশু যখন ২০৫০ সালে পরিণত বয়সে পৌঁছাবে, তখন পৃথিবী এতটাই বদলে গিয়ে থাকবে যে আজকের শিক্ষার বেশিরভাগ বিষয়বস্তু হয়তো অপ্রাসঙ্গিক হয়ে যাবে। তাহলে আজ শিশুদের কী শেখানো উচিত?

হারারির মতে, একুশ শতকের শিক্ষার কেন্দ্রে থাকা উচিত চারটি মূল দক্ষতা — সমালোচনামূলক চিন্তা, সৃজনশীলতা, সহযোগিতা এবং যোগাযোগ। এর সঙ্গে যোগ হওয়া দরকার মানসিক স্থিতিস্থাপকতা — অর্থাৎ পরিবর্তনের মুখে ভেঙে না পড়ে নিজেকে পুনর্গঠন করার ক্ষমতা (Harari, 2018)। কিন্তু বিশ্বের অধিকাংশ শিক্ষাব্যবস্থা এখনো তথ্য মুখস্থ করানো ও পরীক্ষায় নম্বর তোলার উপর নির্ভরশীল। ওয়ার্ল্ড ইকোনমিক ফোরামের প্রতিবেদন অনুযায়ী বিশ্বের ৬৫ শতাংশ প্রাথমিক বিদ্যালয়ের শিক্ষার্থী এমন চাকরিতে যোগ দেবে যা আজ এখনো অস্তিত্বশীল নয়।

বাংলাদেশের শিক্ষাব্যবস্থার সংকট এই বৈশ্বিক সংকটেরই স্থানীয় প্রকাশ। পরীক্ষানির্ভর শিক্ষাব্যবস্থায় জিপিএ-৫ পাওয়া শিক্ষার্থীরা প্রায়ই জীবনের প্রকৃত সমস্যা সমাধানে অক্ষম হয়ে পড়ে। কোচিং সেন্টারের বিস্তার, প্রশ্নপত্র ফাঁসের প্রবণতা এবং সৃজনশীল শিক্ষার অভাব ইত্যাদি প্রমাণ করে যে বাংলাদেশের শিক্ষাব্যবস্থা একুশ শতকের চ্যালেঞ্জের জন্য প্রস্তুত নয়।

রবীন্দ্রনাথের এই সংকটের উত্তর দিয়েছিলেন একশ বছরেরও আগে যখন সংকটটি এত স্পষ্ট ছিল না। তাঁর "শিক্ষার হেরফের" প্রবন্ধে (১৮৯২) তিনি বলেছিলেন প্রচলিত শিক্ষাব্যবস্থা শিশুর জীবনীশক্তিকে ক্ষয় করে দিচ্ছে, তাকে একটি তথ্য-ধারণকারী পাত্রে পরিণত করছে, একটি চিন্তাশীল মানুষে নয় (ঠাকুর, ১৮৯২)। এই সমালোচনা আজকের শিক্ষাব্যবস্থার বিরুদ্ধেও হুবহু প্রযোজ্য।

রবীন্দ্রনাথের শিক্ষাদর্শনের প্রথম মূলনীতি ছিল আনন্দময় শিক্ষা। তিনি বিশ্বাস করতেন ভয় ও চাপের মধ্যে দেওয়া শিক্ষা কখনো স্থায়ী হয় না বরং প্রকৃত শিক্ষা আসে কৌতূহল ও আনন্দ থেকে (ঠাকুর, ১৯১৫)। শান্তিনিকেতনে গাছের নিচে পাঠদান, ঋতু উৎসব পালন এবং শিল্প-সংগীত-নৃত্যের সমন্বয় ছিল এই দর্শনেরই বাস্তব রূপ। আধুনিক শিক্ষাব্যবস্থায় দেখা গেছে আনন্দময় পরিবেশে শিক্ষার্থীদের শেখার হার ও ধারণক্ষমতা উল্লেখযোগ্যভাবে বেশি (Fredrickson, 2001)।

তাঁর দ্বিতীয় মূলনীতি ছিল প্রকৃতির সঙ্গে শিক্ষার সংযোগ। রবীন্দ্রনাথ মনে করতেন চার দেওয়ালের মধ্যে বন্দী শিক্ষা শিশুকে বাস্তব জীবন থেকে বিচ্ছিন্ন করে দেয় (ঠাকুর, ১৯১৫)। প্রকৃতির মধ্যে শিক্ষা শিশুকে পর্যবেক্ষণ করতে শেখায়, প্রশ্ন করতে শেখায় এবং নিজেই উত্তর খুঁজে নিতে শেখায়। আজকের "অভিজ্ঞতামূলক শিক্ষা" বা experiential learning-এর ধারণা রবীন্দ্রনাথের এই পদ্ধতিরই আধুনিক রূপ (Kolb, 1984)।

তৃতীয় মূলনীতি ছিল মাতৃভাষায় শিক্ষা ও বৈশ্বিক দৃষ্টিভঙ্গির সমন্বয়। রবীন্দ্রনাথ আজীবন মাতৃভাষায় শিক্ষার পক্ষে কথা বলেছেন। তিনি দেখিয়েছেন বিদেশি ভাষায় শিক্ষা শিশুর মেধার অর্ধেক শক্তি ভাষান্তরের কাজে নষ্ট করে দেয় এবং তাকে তার নিজের সংস্কৃতি থেকে বিচ্ছিন্ন করে (ঠাকুর, ১৮৯২)। একই সঙ্গে বিশ্বভারতীর নামেই তাঁর বৈশ্বিক দর্শন ধরা আছে। তিনি চাইতেন শিক্ষার্থীরা নিজের সংস্কৃতিতে শিকড় রেখে বিশ্বসংস্কৃতির সঙ্গে যুক্ত হোক (ঠাকুর, ১৯১২)। একুশ শতকে এই স্থানীয় পরিচয় ও বৈশ্বিক নাগরিকত্বের মধ্যে ভারসাম্য অত্যন্ত জরুরি দক্ষতা।

সম্প্রদায় ও মানবিক সংযোগের সংকট

ফেসবুকের মতো প্ল্যাটফর্মগুলো "কমিউনিটি" তৈরির কথা বলে কিন্তু এই ডিজিটাল সম্প্রদায়গুলো প্রকৃত মানবিক সংযোগের জায়গা নিতে পারে না। কারণ মানুষ শুধু তথ্য বিনিময় করে না সে স্পর্শ অনুভব করে, চোখে চোখ রাখে, একসঙ্গে খায় এবং শারীরিক উপস্থিতিতে একে অপরকে সান্ত্বনা দেয়।

শিল্পবিপ্লবের পর থেকে পরিবার, প্রতিবেশী, ধর্মীয় গোষ্ঠী, পেশাদার সংগঠন ক্রমশ দুর্বল হয়ে পড়েছে এবং মানুষ ক্রমশ বিচ্ছিন্ন হয়ে পড়েছে। একুশ শতকে এই বিচ্ছিন্নতা চরম আকার ধারণ করেছে। গবেষণায় দেখা গেছে একাকীত্ব এখন একটি বৈশ্বিক মহামারীতে পরিণত হয়েছে। আমেরিকায় ৬১ শতাংশ প্রাপ্তবয়স্ক মানুষ নিজেদের একাকী বলে রিপোর্ট করেছেন (Cigna, 2020)। একাকীত্বের স্বাস্থ্যগত ক্ষতি প্রতিদিন ১৫টি সিগারেট খাওয়ার সমান বলে গবেষণায় প্রমাণিত হয়েছে (Holt-Lunstad et al., 2015)।

গবেষণা দেখাচ্ছে সামাজিক যোগাযোগ মাধ্যম প্ল্যাটফর্মগুলোর অতিরিক্ত ব্যবহার আসলে একাকীত্ব ও বিষণ্ণতা বাড়ায় (Twenge et al., 2018)। কারণ ডিজিটাল যোগাযোগ প্রকৃত মানবিক সংযোগের গভীরতা ও উষ্ণতা প্রদান করতে পারে না। কোভিড-১৯ মহামারী এই সত্যকে আরও স্পষ্ট করে দিয়েছে। লকডাউনে ভার্চুয়াল যোগাযোগের সুবিধা থাকলেও মানুষ প্রকৃত সামাজিক সংযোগের অভাবে গভীরভাবে ক্ষতিগ্রস্ত হয়েছে (Pancani et al., 2021)।

রবীন্দ্রনাথ দর্শনে মানুষ একা সম্পূর্ণ নয়। সে অন্যের সঙ্গে সম্পর্কের মধ্য দিয়েই নিজেকে আবিষ্কার করে। তাঁর বিখ্যাত উক্তি "আমার এই পথ চাওয়াতেই আনন্দ" আসলে সম্পর্কের যাত্রার আনন্দেরই কথা বলছে যেখানে তিনি গন্তব্যে পৌঁছানোর চেয়ে পথ চলার মধ্যেই জীবনের অর্থ খুঁজেছেন (ঠাকুর, ১৯১৬)।

তাঁর "কাবুলিওয়ালা" ছোটগল্পে যে গভীর মানবিক সংযোগের ছবি আঁকা হয়েছে একজন আফগান ফেরিওয়ালা ও একটি বাংলা শিশুর মধ্যে পিতা-কন্যার সম্পর্ক তা ধর্ম, ভাষা ও সংস্কৃতির সীমানা অতিক্রম করে (ঠাকুর, ১৮৯২)। এই গল্পটি একুশ শতকের বিচ্ছিন্ন পৃথিবীতে এই শক্তিশালী বার্তা দেয় যে মানবিক সংযোগ তৈরি হওয়ার জন্য একই ধর্ম বা একই ভাষার প্রয়োজন নেই, প্রয়োজন শুধু পারস্পরিক মানবতার স্বীকৃতি।

রবীন্দ্রনাথ শান্তিনিকেতনে যে সম্প্রদায় তৈরি করেছিলেন তা একটি বিকল্প মডেল হিসেবে প্রাসঙ্গিক। সেখানে শিক্ষার্থীরা কেবল বিদ্যার্জন করত না; তারা একসঙ্গে বাস করত, একসঙ্গে উৎসব পালন করত, একসঙ্গে প্রকৃতিতে হাঁটত এবং একে অপরের সঙ্গে গভীর সম্পর্ক তৈরি করত (ঠাকুর, ১৯১৫)। এই মডেলে শিক্ষা ও সম্প্রদায় আলাদা ছিল না। শিক্ষা নিজেই একটি সম্প্রদায়িক অভিজ্ঞতা ছিল। আজকে যেখানে ভার্চুয়াল শিক্ষা জনপ্রিয় হচ্ছে, তখন শান্তিনিকেতনের এই মডেল একটি শক্তিশালী বিকল্প দৃষ্টিভঙ্গি।

রবীন্দ্রনাথের প্রকৃতিদর্শন — জলবায়ু ন্যায়বিচারের নৈতিক ভিত্তি

রবীন্দ্রনাথের প্রকৃতিদর্শন কেবল কাব্যিক সৌন্দর্যবোধ নয় বরং একটি গভীর নৈতিক ও দার্শনিক অবস্থান যা আজকের জলবায়ু আন্দোলনের অনেক আগেই জলবায়ু ন্যায়বিচারের ভিত্তি তৈরি করে রেখেছিল। তাঁর কাছে প্রকৃতি একটি জীবন্ত সত্তা, মানবজীবনের অংশীদার এবং পরম সত্তার প্রকাশ (ঠাকুর, ১৯১৬)।

তাঁর "প্রকৃতির প্রতিশোধ" নাটকে এই দর্শন সবচেয়ে স্পষ্টভাবে প্রকাশ পেয়েছে (ঠাকুর, ১৮৮৪)। নাটকে সন্ধ্যাসী চরিত্রটি প্রকৃতিকে প্রত্যাখ্যান করে শুধু বুদ্ধির জগতে বাস করতে চায় এবং প্রকৃতি তার প্রতিশোধ নেয় তাকে জীবনীশক্তিহীন করে দিয়ে। এই রূপকটি আজকের পরিবেশ সংকটের সবচেয়ে নিখুঁত পূর্বাভাস। শিল্পসভ্যতা ঠিক এই ভুলটাই করেছে; প্রকৃতিকে বিজয় করার বস্তু মনে করে তার সঙ্গে সম্পর্ক ছিন্ন করেছে এবং এখন সেই প্রতিশোধের মুখোমুখি।

রবীন্দ্রনাথ মানুষকে প্রকৃতির "মালিক" হিসেবে নয়, প্রকৃতির "অংশ" হিসেবে দেখতেন। তাঁর এই দৃষ্টিভঙ্গি আজকের পরিবেশ দর্শনের "গভীর পরিবেশবাদ" বা deep ecology আন্দোলনের সঙ্গে সামঞ্জস্যপূর্ণ (Naess, 1973)। গভীর পরিবেশবাদ বলে মানুষের কাজে লাগুক বা না লাগুক প্রকৃতির একটা নিজস্ব মূল্য আছে। রবীন্দ্রনাথ এই সত্য সহজাতভাবেই বুঝেছিলেন এবং তাঁর কবিতায় নদী, বৃষ্টি, মেঘ, পাখি ইত্যাদি প্রতিটি প্রকৃতির উপাদানকে স্বতন্ত্র সত্তা হিসেবে উপস্থাপন করেছেন।

রবীন্দ্রনাথের সঙ্গে বাংলাদেশের নদীর সম্পর্ক নিছক ভৌগোলিক নয়, এটি গভীরভাবে ব্যক্তিগত ও আধ্যাত্মিক। শিলাইদহে পদ্মার বৃকে বজরায় ভাসতে ভাসতে তিনি লিখেছেন তাঁর জীবনের অনেক শ্রেষ্ঠ রচনা। "সোনার তরী" কবিতায় পদ্মার বিশাল জলরাশি ও ধানক্ষেত ঘেরা দ্বীপের ছবি আঁকা হয়েছে যা আজকের জলবায়ু উদ্বাস্তর বেদনার প্রতীক হয়ে উঠতে পারে। চাষি একাকী থেকে যায়, তার ফসল নিয়ে সোনার তরী চলে যায় (ঠাকুর, ১৮৯৪)। আজকের বাস্তবতায় পদ্মা শুকিয়ে যাচ্ছে, লবণাক্ততা বাড়ছে এবং উপকূলীয় কৃষকরা তাদের জমি হারাচ্ছে। রবীন্দ্রনাথ যে নদীকে ভালোবেসেছিলেন, যে নদীর তীরে বসে লিখেছিলেন বাংলাদেশের জাতীয় সংগীত "আমার সোনার বাংলা", সেই সোনার বাংলা আজ জলবায়ু পরিবর্তনের প্রথম শিকারদের একটি।

জলবায়ু ন্যায়বিচারের মূল দাবি হলো যারা ক্ষতি করেছে তাদের দায় নিতে হবে এবং যারা ক্ষতিগ্রস্ত হয়েছে তাদের ক্ষতিপূরণ পাওয়ার অধিকার আছে (Shue, 1992)। এই নৈতিক দাবির ভিত্তি রবীন্দ্রনাথের মানবতাবাদী দর্শনেই রয়েছে। তিনি বারবার বলেছেন ক্ষমতাশালীর দায় আছে দুর্বলের প্রতি, এবং এটি কেবল দয়ার বিষয় নয়, নৈতিক বাধ্যবাধকতার বিষয় (ঠাকুর, ১৯১৭)।

তাঁর "জাতীয়তাবাদ" গ্রন্থে তিনি দেখিয়েছেন পশ্চিমা শিল্পসভ্যতা এশিয়া ও আফ্রিকাকে উপনিবেশ করে তাদের সম্পদ লুট করেছে এবং সেই লুটের উপর তাদের সমৃদ্ধি গড়েছে (Tagore, 1917)। একুশ শতকে জলবায়ু পরিবর্তনের প্রেক্ষাপটে এই বিশ্লেষণ নতুন মাত্রা পায়। ধনী দেশগুলো তাদের শিল্পায়নের মাধ্যমে কার্বন নির্গমন করে বায়ুমণ্ডলকে "উপনিবেশ" করেছে এবং সেই উপনিবেশের ক্ষতি বহন করছে বাংলাদেশের মতো দেশগুলো। রবীন্দ্রনাথের উপনিবেশবিরোধী নৈতিক অবস্থান তাই জলবায়ু ন্যায়বিচারের দাবির সঙ্গে সরাসরি সংযুক্ত। তিনি বলেছিলেন অন্যের ক্ষতির উপর প্রতিষ্ঠিত সমৃদ্ধি সভ্যতার অগ্রগতি নয়, অধঃপতন (Tagore, 1917)। জলবায়ু পরিবর্তনের ক্ষেত্রে এই কথাটি হুবহু প্রযোজ্য।

শান্তিনিকেতনে তিনি বার্ষিক "বনমহোৎসব" চালু করেছিলেন যেখানে শিক্ষার্থীরা গাছ লাগাত ও তার যত্ন নিত। কারণ তিনি বিশ্বাস করতেন গাছ লাগানো একটি আধ্যাত্মিক কাজ, এতে ভবিষ্যৎ প্রজন্মের কথা ভাবা হয় (মুখোপাধ্যায়, ১৯৬০)। তাঁর শিক্ষাদর্শনে প্রকৃতির মধ্যে বেড়ে ওঠা শিশু প্রকৃতির প্রতি দায়িত্ববোধ নিয়েই বড় হয় (ঠাকুর, ১৯১৫)। এটিই আজকের জলবায়ু শিক্ষার সবচেয়ে কার্যকর মডেল।

একুশ শতকের যুদ্ধবাস্তবতা

এই মুহূর্তে বিশ্বের একাধিক প্রান্তে একই সময়ে একাধিক সশস্ত্র সংঘাত চলছে যা প্রতিদিন আন্তর্জাতিক সংবাদমাধ্যমের শিরোনাম দখল করছে। এই যুদ্ধগুলো মানবতার গভীরতম প্রশ্নগুলো সামনে নিয়ে আসছে।

ইরান-যুক্তরাষ্ট্র-ইসরায়েল যুদ্ধ এই মুহূর্তে বিশ্বের সবচেয়ে বিপজ্জনক সংঘাত। ইরানের রাষ্ট্রদূত জানিয়েছেন এ পর্যন্ত দেড় হাজারেরও বেশি বেসামরিক নাগরিক নিহত হয়েছেন। ইরান হরমুজ প্রণালী বন্ধ করে দেওয়ায় বৈশ্বিক জ্বালানি সংকট তৈরি হয়েছে।

ইউক্রেন-রাশিয়া যুদ্ধ ২০২২ সালের ফেব্রুয়ারি থেকে চলমান। গাজার যুদ্ধ ২০২৩ সালের অক্টোবর থেকে চলছে। সুদানের গৃহযুদ্ধ ২০২৩ সালের এপ্রিল থেকে চলছে। এই যুদ্ধগুলোর প্রতিটি ক্ষেত্রে বেসামরিক মানুষ বিশেষত শিশু ও নারী সবচেয়ে বেশি ক্ষতিগ্রস্ত হচ্ছেন। প্রতিটি সংঘাতে ধর্মীয়, জাতিগত বা রাজনৈতিক পরিচয়কে হাতিয়ার হিসেবে ব্যবহার করা হচ্ছে। আধুনিক প্রযুক্তি যেমন ড্রোন, সাইবার অস্ত্র ও কৃত্রিম বুদ্ধিমত্তা ইত্যাদি যুদ্ধকে আরও নির্মম ও ব্যাপক করে তুলছে (Roff, 2014)। এবং প্রতিটি ক্ষেত্রেই জাতিসংঘসহ আন্তর্জাতিক প্রতিষ্ঠানগুলো যুদ্ধ থামাতে অসহায়ত্ব প্রকাশ করছে।

রবীন্দ্রনাথ যুদ্ধকে কেবল রাজনৈতিক ব্যর্থতা হিসেবে দেখেননি, তিনি যুদ্ধকে দেখেছেন মানবতার বিরুদ্ধে সবচেয়ে গভীর অপরাধ হিসেবে। প্রথম বিশ্বযুদ্ধ (১৯১৪-১৮) তাঁর জীবনে গভীর ছায়া ফেলেছিল। ইউরোপীয় সভ্যতার প্রতি তাঁর যে আশাবাদ ছিল, সেই যুদ্ধের নৃশংসতা তা ভেঙে দিয়েছিল। "নেশনালিজম" গ্রন্থে তিনি লিখেছেন উগ্র জাতীয়তাবাদ ও ক্ষমতার লোভই এই ধ্বংসের মূল কারণ (Tagore, 1917)।

আজকে যখন একটি দেশের শিশুদের বিদ্যালয়ে বোমা ফেলা হয়, তখন রবীন্দ্রনাথের সেই প্রশ্নটি নতুনভাবে জ্বলে ওঠে — কোন সভ্যতার নামে এই কাজ হচ্ছে? তাঁর "সভ্যতার সংকট" প্রবন্ধে (১৯৪১) তিনি লিখেছিলেন পশ্চিমা সভ্যতার বস্তুগত অগ্রগতি নৈতিক উন্নতির প্রমাণ নয়। যে সভ্যতা শিশুদের হত্যা করে তার অগ্রগতি প্রকৃত অর্থে অধঃপতন (ঠাকুর, ১৯৪১)।

রবীন্দ্রনাথ জানতেন যুদ্ধ কেবল শরীরকে হত্যা করে না, যুদ্ধ মানুষের ভেতরের মানবিক সত্তাকে ক্ষয় করে দেয়। তাঁর "রক্তকরবী" নাটকে যন্ত্রসভ্যতার নামে মানুষকে সংখ্যায় পরিণত করার বিরুদ্ধে যে প্রতিবাদ আছে, তা আজকের যুদ্ধেও প্রযোজ্য যেখানে "কোলাটারাল ড্যামেজ" বলে শিশুমৃত্যুকে পরিসংখ্যানে পরিণত করা হয় (ঠাকুর, ১৯২৬)।

রবীন্দ্রনাথের "বিশ্বমানব" ধারণা একুশ শতকের যুদ্ধবিধ্বস্ত পৃথিবীতে সবচেয়ে প্রাসঙ্গিক দার্শনিক অবস্থান। তিনি বিশ্বাস করতেন জাতীয় সীমানা মানুষের মৌলিক ঐক্যকে ভাঙতে পারে না। ইরানের শিশু, ফিলিস্তিনের মা, ইউক্রেনের কৃষক এবং সুদানের উদ্বাস্তু সকলেই একই মানবপরিবারের সদস্য (Tagore, 1917)। এই দৃষ্টিভঙ্গি আজকের "আমরা বনাম তারা" বয়ানের বিরুদ্ধে সবচেয়ে শক্তিশালী নৈতিক প্রতিরোধ।

রবীন্দ্রনাথের শেষ বার্তা যা আজও প্রাসঙ্গিক

১৯৪১ সালে মৃত্যুশয্যায় শুয়ে দ্বিতীয় বিশ্বযুদ্ধের ধ্বংসযজ্ঞ দেখতে দেখতে রবীন্দ্রনাথ তাঁর শেষ গদ্যরচনা "সভ্যতার সংকট" লিখেছিলেন। সেখানে তিনি বলেছিলেন, "মানুষের প্রতি বিশ্বাস হারানো পাপ।" পারমাণবিক হুমকি, ক্ষমতার দল্ল ও জাতীয়তাবাদী উন্মাদনার মধ্যেও তিনি মানবতার উপর আস্থা রেখেছিলেন (ঠাকুর, ১৯৪১)।

আজ ২০২৬ সালে যখন তেহরানের আকাশে ধোঁয়া উঠছে, গাজার শিশুরা ধ্বংসস্রুপে খেলছে, ইউক্রেনের মাঠে গোলার শব্দ থামছে না এবং সুদানের উদ্বাস্তু শিবিরে মানুষ অনিশ্চয়তায় দিন কাটাচ্ছে তখন রবীন্দ্রনাথের এই বিশ্বাসটুকু আঁকড়ে ধরা ছাড়া মানবজাতির সামনে আর কী পথ আছে?

যুদ্ধ শেষ হয়, কিন্তু মানবতার প্রশ্ন শেষ হয় না। রবীন্দ্রনাথ আমাদের মনে করিয়ে দেন যতক্ষণ মানুষ অন্য মানুষের মানবিক মর্যাদাকে স্বীকার করতে পারবে, ততক্ষণ যুদ্ধের বিরুদ্ধে প্রতিরোধও থাকবে।